

Protocol da la radunàza Da l'Uniuin Rumantscha Grischun Central (URGC), igls 8-10-20 a las 20.15, scola Donat

PreschaintAs: 21 parsùnas, da quellas en 9 giasts
Parstgisas: Cornelia Candreia, Gian Sonder, Sascha Pittet, Johann Clopath, Giuanna Clopath, Pol Dosch, Sandra Baltermia-Guetg

1. **Bagnvagnieu:**

La Zegna salida cordialmeing igls preschaints. La parmavera e'gl betga sto pussevel da far egna radunàza generala parve digl scumond da s'antupar. Ella gi, ca l'iniziativa ancùnter igl rumantsch grischùn an las scolas rumàntschas da Surmir vegi comuento igls rumàntschs tant sco ànc mai egn'otra dumonda rumàntscha an Surmir. L'URGC à betga sustanieu l'iniziativa, ascheia sco ear 80% digls surmesters betg. Mo igl pievel e sto da l'ideia c'igl segi nign problem da midar an surmiran, ascheia c'igls Surmirans àn vuscho clerameing pigl idiom. Igl vuschaders a las vuschadras da la Val Alvra a da Làntsch vegian pletost musso egn desinteress anviers quegl ca capeta an las scolas rumàntschas. Ella dubitescha ca la reintroduziùn digl surmiran segi egn gudogn a spera c'ella vegi betga raschùn. Ussa dovri, tant duple, glied ca s'angaschi pigl rumantsch a la fegnamira segi ear da duvrar el da maniera corecta.

2. **Elecziùn dumbravusch:**

Adrian Farrér vean proponieu a ligieu.

3. **Aprovar igl protocol da la davosa radunàza generala:**

Igl protocol àn ign savieu liger sen la pagina web da l'URGC. El vean aprovo cun 20 vuschs.

4. **Aprovar igl raport da gestiùn 2019 (publitgieu Revista digl noss Sulom 2020/02)**

Igl podcasts da las getgas tgat'ign sen la pagina web da l'URGC. La Zegna resuma curtameing igl raport a ranviescha a la preschantaziùn digl cudesch da l'Andrina Beeli "Egn vieadi tras la Val Schons" ad a la translaziùn rumàntscha digl cudesch "Ana a Rosa" digl Parc natiral Bavregn ca vean mademameing preschanto a la fegn. Igl raport vean aprovo cun 22 vuschs.

5. **Aprovar igl rendaquent 2019 ad igl raport digls revisurs:**

Marc Decurtins preschainta igl quent digl on 2019. Igl quent seara cun egn surple da 9623.93 fràncs. La suma da bilantscha munta a 119'674.83 fr. Igl revisurs lodan igl rendaquent. El vean aprovo cun 20 vuschs.

6. **Elecziùns:**

- presidentA near copresidentA (demissiùn Zegna Pittet-Dosch):

La Zegna tgala ussa definitivameing suainter 14 ons an suprastànza a 7 ons sco presidentA. Ella leva calar la parmavera 2019, mo cunquegl c'ign veva cato ni egna parsùna pigl presidi ni egna pigl co-presidi à'la cuntinuo par egn on. Malgrad ca 35 parsùnas en vagnidas contactadas, par amparar sch'ellas vegian interess da vagnir an suprastànza near da far (co)presidentA, e'gl betga sto pussevel da catar candidatAs par la suprastànza. Ear or da la radunàza generala vean nigla proposta. Cunquegl ca la Gierina e me prùnta da luvrar an egn co-presidi resta l'URGC sainza timùn.

La Gierina angraztga agl num da la suprastànza a la Zegna par la sia grànda lavur. La Zegna e speditiva, cumpetenta, ella à igls seas sens dapertut ad egna grànda experientscha an

quegl ca partutga igl rumàntsch. Ella prenda speart dezisiùns a sa insister, ella dat betga sei sch'ella vut cuntanscher anzatge. La Zegna â nigna tema da gir igl sieus meni. Ella Zegna â luvro fetg blear par l'URGC. Trànteroter e ella stada raspunsavla da reorganisar la Revista digl noss Sulom. Igl cumbat ancunter l'iniziativa ancunter igl rumàntsch grischùn â duvro blear'energeia a tains. La Zegna survean egn matg flurs ad egn bùn par egn fegn d'eanda an egn hotel.

-supleantA da suprastàntza (demissiùn Petra Uffer):

Ear qua e'gl vagnieu cato nignA candidatA ad igl dat nignas propostas or da la radunàntza generala.

-delego/delegada LR (demissiùn Petra Uffer):

La Carola Derungs sameta a disposiziùn ad ella vean ligida cun aplaus.

7. **Fixar igl program d'actividad 2020:**

Cunquegl c'igl dat nignA presidentA dat igl ear betg egn grànd program pigl rest da la perioda da gestiùn. L'actividad vean ad easser ancurir igls supstànts ca màncan, oravàntut pigl presidi. Mo ear vignan betga a mantgear las savundàntas activitads:

- ediziùn da la Revista digl noss Sulom
 - sustaner tarmaglieras an Sutselva ad an Surmir
 - observar igl svilup da rumàntsch an las scolas
 - observar a sustaner igl diever digl rumàntsch agls vaschinadis
- Igl program d'activitads vean aprovo.

8. **Aprovar igl preventiv 2020.**

Igl cassier Marc Decurtins preschainta igl preventiv ca preveza antradas da 51'300 fr a sortaidas da 64'000 fr.

Quella rendita negativa saresulta primarmeing or digl angaschi da l'URGC ancunter l'iniziativa par la reintroducziùn digl surmiran an scola.

Igl preventiv vean aprovo cun 20 vuschs

9. **Fixar las contribuziùns anualas 2020:**

La proposta e da schar madem las contribuziùns anualas, 30.- par singuls a 50.- par peers, par colectivs a par parsùnas giuridicas.

La cuntribuziùns anualas vignan aprovadas cun 21 vuschs.

10. **Discussiùn strategeia LR an consultaziùn** (da catar sut www.liarumantscha.ch)

Las strategeias en an consultaziùn antocen igls 15 d'october.

Remartgas or da la radunàntza generala: Visiùns màncan, igl â nut da nov, nigna strategeia.

Ranfategas anviers la LR e c'ella â gnànc ampruvo da sustaner igl rg an scolas rumàntschas.

"RG e qua par betga stuer far tut an 5 idioms a nus fagiagn tut an 5 idioms plus rg!", e sto egn votum or digl ravugl da la radunàntza generala.

Igl president da la Leia Rumantscha Johannes Flury prenda posiziùn: Igl cantùn Grischùn â grànda autonomia digls cumegn. La lescha da scola gi c'igl cumegn sa dezider tge rumàntsch da scola c'el vut. La LR â dezidieu da sataner or a betga prender posiziùn.

L'URGC â dastgieu s'angaschar pigl rg.

Visiùn proponida: Midar lescha da scola.

Votum or da la radunàntza generala: La situaziùn dad oz fa nignas gràndas spràntzas. L'URGC a la LR vessan da sameter anzemel par catar anzatgi ca s'angascha par la situaziùn rumàntsch. La LR stuess sustaner las regiùns rumàntschas agl Grischùn a betg an la bassa.

Gierina Michael: Pigl mumaint dat igl betga parsùnas c'ân schlàntsch da far presidentA par

l'URGC. Parquagl vean igl ear ad easser greav da catar schiglioc anzatgi ca s'angascha pigl rumantsch. L'ideia e da s'angaschar an las structurav avànt màn. Nus stuagn spitgear antocen la parmavera, cur ca la proxima radunanza generala à liac, cun la spranza da catar antocen alura parsunas par la suprastanza.

La Carmen Dedual, promotura da la LR: Igl fuss bien da far egn cumissiun par vurdar tge c'ign sa far par igl rumantsch an Surmir. Ella à, an la sia funcziun sco promotura, gieu contact cun las parsunas c'àn lantscho l'iniziativa ancunter igl rumantsch grischùn. Ign stuess ussa vagnir anzemel ad antschever da far pasch. Nus stuagn catar egn veia comunabla. Betga meter an dumonda la democrazeia.

Igl dilema e c'igl dat parsunas, ca gin c'i vighan s'angaschar, mo ellas vutan pigl mumaint betga sameter a disposiziun par s'angaschar an la suprastanza da la URGC.

11. Varia:

- Carmen Dedual angraztga fetg a la Zegna par igl sieus angaschi a giavischa ad ella tut igl bien.
- Linard Candreia gi ca divers cudeschs segian exhausts. Proposta da rimnar perlas literaras an Surmir. Igl madem stuess ign ear far cun la literatura sutsilvana.
- Martin Cantieni angraztga fetg a la Zegna. El e desilusiuno ca nign surprinda igl presidi.
- Johannes Flury: 40% digls rumantschs vivan ordaifer igl Grischùn. El e schon 5 ons president da la LR. La Zegna veva proponieu el avànt 5 ons. An egn on sto el calar. Ear igl Gion Capeder sto calar parve da limitaziun digl tains. Sch'el vagness president savess el far anavànt an la suprastanza. Mo el vut ànc betg. Igl giavisch e da far propostas par ocupar igls posts.
- Egn legrevla nova e c'igl à do, malgro Corona, bunameing igl dubel d'anunztgas pigl curs da rumantsch uon.
- Andreas Gabriel angraztga par la lavur da las colavuraturas da la LR.
- La Gierina angraztga a la LR par igl angaschi an conex cun la fusiun da la Muntogna da Schons. Ella angraztga ear agls/ a las redacturas digl Sulom, digl Calender par mintgagi ad agls redactors da la Quotidiana a la Pagina da Surmir ca cuntribueschan cun lur texts ear a la promoziun digl rumantsch agl antsches da l'URGC.

Preschantaziun a vendita da publicaziuns da la URGC a cun agid da la URGC

- Igl cudesch "Egn vieadi tras la Val Schons" d'Andrina Beeli: Ella à scret igl cudesch an conex cun la lavur da matura. L'ideia ear'igl da scriver sur las vischnancas da la Val Schons. Igl cudesch e orno cun maletgs a fotografeias c'ella à fatg seza cun agid digl Matthias Kunfermann.
- Egn oter product c'e vagnieu realiso cun agid da l'URGC e igl cudesch da "Egn stad cun Anna a Rosa". Igl cudesch e digl Parc Natiral, mo eara vagnieu fatg me par tudestg a tras l'URGC realiso par rumantsch. L'ideia digl cudesch cuagl tema las palés sen l'alp Curtginatsch e oriundameing da students da Turitg, sco la Christina Casparis digl Parc natiral Bavregn raquenta. La translaziun e vagnida fatga da Sina-Mara Hassler, c'è ear anzemel cuagl frar a cun amitgs registro las getgas sutsilvanas. Igl e legrevel c'igls giuvens s'angaschan pigl rumantsch.

La sasida seara ad igls cudesch vignan vandieus.